

দাউদ (আঃ)-এর বৈশিষ্ট্য সমূহ

আল্লাহ প্রত্যেক নবীকে স্বতন্ত্র কিছু বৈশিষ্ট্য দান করেছেন। সেমতে দাউদ (আঃ)-কে প্রদত্ত বৈশিষ্ট্য সমূহ নিম্নে বিবৃত হ'ল।-

১. আল্লাহ দাউদ (আঃ)-কে আধ্যাত্মিক ও দৈহিক শক্তিতে বলিয়ান করে সৃষ্টি করেছিলেন। যেমন আল্লাহ বলেন,

১৭- (وَإِذْ كُنَّا عَبْدًا دَاوُودَ ذَا الْأَيْدِ إِنَّهُ أَوَّابٌ - (ص

আমার বান্দা দাউদকে। সে ছিল শক্তিশালী এবং আমার প্রতি সদা প্রত্যাবর্তনশীল' (ছোয়াদ

৩৮/১৭)। আয়াতের প্রথমাংশে তাঁর দৈহিক ও দুনিয়াবী শাসন শক্তির কথা বলা হয়েছে এবং

শেষাংশে তাঁর আধ্যাত্মিক শক্তির কথা বলা হয়েছে।

এজন্য যে, বিরাট ও অপ্রতিদ্বন্দ্বী বাদশাহ হওয়া

সত্ত্বেও তিনি সর্বদা আল্লাহর প্রতি নিবেদিতপ্রাণ

ছিলেন। সকল কাজে তাঁর দিকেই ফিরে যেতেন।

বুখারী ও মুসলিমের এক হাদীছে রাসূলুল্লাহ (ছাঃ)

বলেন, আল্লাহ তা'আলার নিকটে সর্বাধিক

পসন্দনীয় ছালাত হ'ল দাউদ (আঃ)-এর ছালাত

এবং সর্বাধিক পসন্দনীয় ছিয়াম ছিল দাউদ (আঃ)-

এর ছিয়াম। তিনি অর্ধরাত্রি পর্যন্ত ঘুমাতেন।

অতঃপর এক তৃতীয়াংশ ছালাতে কাটাতেন এবং

শেষ ষষ্ঠাংশে নিদ্রা যেতেন। তিনি একদিন অন্তর

একদিন ছিয়াম রাখতেন। শত্রুর মোকাবিলায় তিনি কখনো পশ্চাদপসরণ করতেন না'।[6]

২. পাহাড় ও পক্ষীকুল তাঁর অনুগত ছিল। যেমন

আল্লাহ বলেন, *إِنَّا سَخَّرْنَا الْجِبَالَ مَعَهُ يُسَبِّحْنَ بِالْعَشِيِّ*

(- ১৯-১৮ وَالْإِشْرَاقِ - وَالطَّيْرَ مَحْشُورَةً، كُلٌّ لَهُ أَوَّابٌ - (ص

‘আমরা পর্বতমালাকে তার অনুগত করে

দিয়েছিলাম। তারা সকাল-সন্ধ্যায় তার সাথে

পবিত্রতা বর্ণনা করত’। ‘আর পক্ষীকুলকেও, যারা

তার কাছে সমবেত হ’ত। সবাই ছিল তার প্রতি

প্রত্যাবর্তনশীল’ (ছোয়াদ ৩৮/১৮-১৯)। একই মর্মে

বক্তব্য এসেছে সূরা সাবা ১০ আয়াতে। অন্যদিকে

আল্লাহ দাউদ-পুত্র সুলায়মানের অধীনস্ত করে

দিয়েছিলেন বায়ুকে ও জিনকে। পাহাড় ও পক্ষীকুল
হযরত দাউদ (আঃ)-এর কিভাবে আনুগত্য করত-
সে বিষয়ে কোন বক্তব্য কুরআনে আসেনি।

তাফসীরবিদগণ নানাবিধ সম্ভাবনা ব্যক্ত করেছেন।

আমরা সেগুলিকে এড়িয়ে গেলাম। কেননা ইবনু

আববাস (রাঃ) বলেছেন, *أَبْهَمُوا مَا أَبْهَمَهُ اللَّهُ* 'আল্লাহ যে

বিষয়কে অস্পষ্ট রেখেছেন, তোমরাও তাকে

অস্পষ্ট থাকতে দাও'।[7]

৩, ৪ ও ৫. তাঁকে দেওয়া হয়েছিল সুদূর সাম্রাজ্য,

গভীর প্রজ্ঞা ও অনন্য বাগ্মিতা। যেমন আল্লাহ

বলেন,

٢٠- وَشَدَدْنَا مُلْكَهُ وَأَتَيْنَاهُ الْحِكْمَةَ وَفَصَّلَ الْخِطَابِ- (ص)

‘আমরা তার সাম্রাজ্যকে সুদৃঢ় করেছিলাম এবং তাকে দিয়েছিলাম প্রজ্ঞা ও ফায়ছালাকারী বাগ্মিতা’ (ছোয়াদ ৩৮/২০)। উল্লেখ্য, আবু মূসা আশ’আরী (রাঃ) ও ইমাম শাবী বলেন যে, ‘তিনিই সর্বপ্রথম বক্তৃতায় হাম্দ ও ছালাতের পর *أما بعد* (‘অতঃপর’) শব্দ যুক্ত করেন’। [৪] পূর্বেই আমরা বলেছি যে, তাঁর এই সাম্রাজ্য ছিল শাম ও ইরাক ব্যাপী। যা আধুনিক সিরিয়া, লেবানন, জর্ডান, ফিলিস্তীন ও ইরাককে শামিল করে। আল্লাহ বলেন,

يَا دَاوُودُ إِنَّا جَعَلْنَاكَ خَلِيفَةً فِي الْأَرْضِ فَاحْكُم بَيْنَ النَّاسِ بِالْحَقِّ وَلَا تَتَّبِعِ الْهَوَىٰ فَيُضِلَّكَ عَنْ سَبِيلِ اللَّهِ إِنَّ الَّذِينَ يَضِلُّونَ عَنْ سَبِيلِ اللَّهِ لَهُمْ

٢٦- عَذَابٌ شَدِيدٌ بِمَا نَسُوا يَوْمَ الْحِسَابِ- (ص)

'হে দাউদ! আমরা তোমাকে পৃথিবীতে খলীফা
করেছি। অতএব তুমি মানুষের মাঝে ন্যায়সঙ্গত
ফায়ছালা কর এবং খেয়াল-খুশীর অনুসরণ কর না।
তাহ'লে তা তোমাকে আল্লাহর পথ হ'তে বিচ্যুত
করবে। নিশ্চয়ই যারা আল্লাহর পথ হ'তে বিচ্যুত
হয়, তাদের জন্য রয়েছে কঠোর শাস্তি এ কারণে
যে, তারা হিসাব দিবসকে ভুলে যায়' (ছোয়াদ
৩৮/২৬)।

৬. লোহাকে আল্লাহ তাঁর জন্য নরম করে
দিয়েছিলেন। যেমন আল্লাহ বলেন,

وَلَقَدْ آتَيْنَا دَاوُودَ مِنَّا فَضْلًا يَا جِبَالُ أَوِّبِي مَعَهُ وَالطَّيْرَ وَالنَّارَ لَهُ
الْحَدِيدَ- أَنْ اْعْمَلْ سَابِغَاتٍ وَقَدِّرْ فِي السَّرْدِ وَاعْمَلُوا صَالِحًا إِنِّي بِمَا
- (١١٠-١١١) تَعْمَلُونَ بَصِيرٌ - (سبا)

'...এবং আমরা তার জন্য লোহাকে নরম করে
দিয়েছিলাম' 'এবং তাকে বলেছিলাম প্রশস্ত বর্ম
তৈরী কর ও কড়াসমূহ যথাযথভাবে সংযুক্ত কর
এবং তোমরা সৎকর্ম সম্পাদন কর। তোমরা যা
কিছু কর, তা আমরা দেখে থাকি' (সাবা ৩৪/১০-
১১)।

উল্লেখ্য যে, হযরত দাউদ (আঃ) একজন দক্ষ
কর্মকার ছিলেন। বিশেষ করে শত্রুর মোকাবিলার
জন্য উন্নত মানের বর্ম নির্মাণে তিনি ছিলেন

একজন কুশলী কারিগর। যা বিক্রি করে তিনি
সংসার যাত্রা নির্বাহ করতেন। রাষ্ট্রীয় কোষাগার
থেকে নিজের ভরণপোষণের জন্য কিছুই নিতেন
না। যদিও সেটা নেওয়া কোন দোষের ছিল না।
এখানে লোহাকে বাস্তবে মোমের মত নরম করার
প্রকাশ্য অর্থ নিলে সেটা হবে তাঁর জন্য মু'জেযা
স্বরূপ, যা মোটেই অসম্ভব নয়। অবশ্য নরম করে
দেওয়ার অর্থ লোহাকে সহজে ইচ্ছামত রূপ
দেওয়ার ও উন্নতমানের নির্মাণ কৌশল শিক্ষাদানও
হ'তে পারে। যেমন অন্যত্র আল্লাহ বলেন,

وَعَلَّمْنَاهُ صَنْعَةَ لَبُؤْسٍ لَّكُمْ لِيُحْصِنَكُمْ مِّنْ بَأْسِكُمْ فَهَلْ أَنْتُمْ شَاكِرُونَ-

(الأنبياء) ৮০-(

‘আর আমরা তাকে তোমাদের জন্য বর্ম নির্মাণ
কৌশল শিক্ষা দিয়েছিলাম, যাতে তা যুদ্ধের সময়
তোমাদেরকে রক্ষা করে। অতএব তোমরা কি
কৃতজ্ঞ হবে? (আশ্বিয়া ২১/৮০)।

ইতিহাস থেকে জানা যায় যে, ভারতবর্ষের বাদশাহ
আওরঙ্গজেব (১৬৫৮-১৭০৭ খৃ:) নিজ হাতে টুপী
সেলাই করে তা বাজারে বিক্রি করে জীবিকা নির্বাহ
করতেন। রাষ্ট্রীয় কোষাগার থেকে কিছুই নিতেন
না। বস্তুতঃ নবী-রাসূলগণই ছিলেন সকল উন্নত
চরিত্রের পথিকৃৎ।

৭. আল্লাহ পাক দাউদকে নবুঅত দান করেন এবং
তাকে এলাহী কিতাব ‘যবুর’ দান করে কিতাবধারী

রাসূলের মর্যাদায় অভিষিক্ত করেন। যেমন তিনি বলেন, *وَآتَيْنَا دَاوُودَ زَبُورًا* - 'আমরা দাউদকে 'যবুর' প্রদান করেছিলাম' (নিসা ৪/১৬৩)। হযরত দাউদকে যে আল্লাহ অতুলনীয় সাম্রাজ্য দান করছিলেন, সেটা যেন যবুরের ভবিষ্যদ্বাণীরই বাস্তব রূপ। কেননা যবুরে আল্লাহ তাঁর সৎকর্মশীল বান্দাদেরকে পৃথিবীর অধিকারী হওয়ার সুসংবাদ দিয়েছেন। যেমন আল্লাহ বলেন,

وَلَقَدْ كَتَبْنَا فِي الزَّبُورِ مِنْ بَعْدِ الذِّكْرِ أَنَّ الْأَرْضَ يَرِثُهَا عِبَادِيَ

(-الصَّالِحُونَ-)(الأنبياء)

‘আমরা বিভিন্ন উপদেশের পর যবুরে একথা লিখে দিয়েছি যে, আমার সৎকর্মশীল বান্দাগণ অবশেষে পৃথিবীর উত্তরাধিকারী হবে’ (আশ্বিয়া ২১/১০৫)।

৮. তাঁকে অপূর্ব সুমধুর কণ্ঠস্বর দান করা হয়েছিল। যখন তিনি যবুর তেলাওয়াত করতেন, তখন কেবল মানুষ নয়, পাহাড় ও পক্ষীকুল পর্যন্ত তা একমনে শুনত। এ দিকে ইঙ্গিত করেই আল্লাহ বলেন,

وَلَقَدْ آتَيْنَا دَاوُودَ مِنَّا فَضْلًا يَا جِبَالُ أَوِّبِي مَعَهُ وَالطَّيْرَ وَالنَّارُ لَهُ

١٥٠-الْحَدِيدَ- (سبا)

‘আমরা দাউদের প্রতি আমাদের পক্ষ হ’তে অনুগ্রহ প্রদান করেছিলাম এই মর্মে আদেশ দান করে যে, হে পর্বতমালা! তোমরা দাউদের সাথে

বারবার তাসবীহ সমূহ আবৃত্তি কর এবং (একই নির্দেশ দিয়েছিলাম আমরা) পক্ষীকুলকেও ...'

(সারা ৩৪/১০)। আধুনিক বিজ্ঞান প্রমাণ করে দিয়েছে যে, পাহাড় ও মাটির এক ধরনের জীবন রয়েছে, যা তাদের জন্য উপযোগী।[৭] এ বিষয়টি আল্লাহ অন্যত্র বলেন এভাবে,

وَسَخَّرْنَا مَعَ دَاوُودَ الْجِبَالَ يُسَبِّحْنَ وَالطَّيْرَ وَكُنَّا فَاعِلِينَ - (الأنبياء

৭৯-(

'আমরা পাহাড়কে ও পক্ষীকুলকে দাউদের অনুগত করে দিয়েছিলাম, তারা তাসবীহ পাঠ করত এবং আমরা এটা করে থাকি' (আশ্বিয়া ২১/৭৯)।

অতএব দাউদের কণ্ঠস্বর শোনা, তাঁর অনুগত হওয়া
ও আল্লাহর বাণী যবুরের আয়াতসমূহের প্রতি
মনোযোগী হওয়া এবং আল্লাহর পবিত্রতা ঘোষণা
করা পাহাড় ও পক্ষীকুলের জন্য মোটেই আশ্চর্যের
বিষয় নয়। শেষনবী মুহাম্মাদ (ছাঃ)-এর জন্য বনের
পশু, পাহাড়, বৃক্ষ তাঁর সামনে মাথা নুইয়েছে ও
ছায়া করেছে, এমনকি স্বস্থান থেকে উঠে এসে বৃক্ষ
তাঁর সম্মুখে দাঁড়িয়েছে, এগুলি সব চাক্ষুষ
ঘটনা। [10] একদা রাসূলুল্লাহ (ছাঃ) ও তাঁর তিন
সাথী আবুবকর, ওমর ও ওছমান একটি পাহাড়ে
উঠলেন। তখন পাহাড়টি কাঁপতে শুরু করল।
রাসূলুল্লাহ (ছাঃ) পাহাড়টিকে ধমক দিয়ে বললেন,

স্থির হও! তোমার উপরে আছেন একজন নবী,
একজন ছিদীক ও দু'জন শহীদ'।[11] এর দ্বারা
উদ্ভিদ ও পর্বতের জীবন ও অনুভূতি প্রমাণিত হয়।
অতএব আল্লাহর অপর নবী দাউদ (আঃ)-এর জন্য
পাহাড়, পক্ষী, লৌহ ইত্যাদি অনুগত হবে, এতে
বিস্ময়ের কিছু নেই। যদিও বস্তুবাদীরা চিরকাল
সন্দেহের অন্ধকারে থেকেছে, আজও থাকবে।
আল্লাহর রহমত না হ'লে ওরা অন্ধকারের
ক্রিমিকীট হয়েই মরবে।

[6]. মুত্তাফাক আলাইহ, মিশকাত হা/১২২৫

'রাত্রিতে নফল ছালাতে উৎসাহ দান' অনুচ্ছেদ-

৩৩।

[7]. বায়হাক্বী, মা'রেফাতুস সুনান ওয়াল আছার,
হা/৪৩৮৮।

[8]. কুরতুবী বলেন, 'যদি উক্ত বক্তব্য সঠিক হয়,
তবে সেটি ছিল দাউদ (আঃ)-এর নিজের ভাষায়,
আরবী ভাষায় নয়' (ঐ, তাফসীর ছোয়াদ ২০)।

[9]. দ্রঃ হামীম সাজদাহ ৪১/১১; মুহাম্মাদ আবদুর
রহীম, স্রষ্টা ও সৃষ্টিতত্ত্ব (ই, ফা, বা, ২০০৩) পৃঃ
৩৫৭, ৩৮৬-৮৯।

[10]. তিরমিযী, শারহুস সুন্নাহ, দারেমী, মিশকাত
হা/৫৯১৮, ২২, ২৪-২৬ 'মো'জেযা' অনুচ্ছেদ-৯।

[11]. তিরমিযী, নাসাইঈ, মিশকাত হা/৬০৬৬
'ওছমানের মর্যাদা' অনুচ্ছেদ; হাদীছ হাসান,

ইরওয়া হা/১৫৯৪-এর আলোচনা দ্রষ্টব্য, ৬/৩৯-৪০
পৃ:। এর দ্বারা আরেকটি বিষয় প্রমাণিত হয় যে,
আমৃত্যু ওছমান (রাঃ) ছিলেন সত্যের উপর
প্রতিষ্ঠিত। আর তার বিরোধীরা ছিল স্রেফ
মিথ্যারোপকারী। এযুগেও তারা মিথ্যা রটনাকারী।
অতএব সত্যসন্ধানীরা এদের অপপ্রচার থেকে
সাবধান থাকবেন। -লেখক।